

ROMANOS

Romanosbi kallari parluguna

Pi escribiga: Kai cartadaga Saulo shuti Pablomi Jesusta crij Roma pueblobi kausajkunamu kachashka (Ro 1.6-7).

Ima uradi escribiga: Jesucristo wacharishka k'ipa pichka chungu kanchis (57) wata shinabimi escribishka yuyachin.

Pabloga Cilicia llakta Tarso pueblomundamiga (Hch 21.39), shinaidi Jerusalen-bi Gamaliel yachachishkada yallida yachaj fariseomiga (Hch 22.3). Pabloga na israelgunamu Alli Shimida parlachun kachushkamiga (Gl 1.16).

Kai cartabiga Jesús wañushkamunda ñukuchida Dios ima juchachinash illuj-ta rurashkadami rikuchin. Jesusga ñukuchi alli kausachun munusha ayudajmi. Tuki yachanagunamunda ashallami kaibi tiyan: tukiguna jucha mandushka kausagunchi (3.9-20), Jesucristoda crijkunadaga Dios juchachinash illujta japisha kishpichin (4.1-25), Jesús ñukuchi juchayujkunamunda wañuga (5.1-11), Diosbuj Espíritu ñukuchi kabishkada rurachun ayudan (8.1-17), Diosbuj k'uyimundaga pish nalladi ñukuchida karuyachi pudingachu (8.28-39), ima laya ñukuchi kausa-nadash (12.1-21).

Pablo saludashkamunda

1 ¹Ñukaga, Jesucristobujta rurujkish, Dios agllusha kachushka gachun kayashkash shinaidi Diosbuj Alli Shimida yachi chayachichun ch'ikunyachishka Pablomi gani. ²Chi Alli Shimidaga Diosga Pai nishkada parlujkunamu ñaubamu escribichisha Paibuj jucha illaj Shimibi 'Kushami' nishkaga. ³⁻⁴Kai Alli Shimiga ñukuchij Mandaj Jesucristomundami parlan; Paiga aichamunda rikukiga Rey Davidbuj wawagunaj wawagunamundami wachariga; Paiga ima mapash illuj Espiritumundaga, wañushkagunaj chaubimunda kausachikimi poderyuj Diosbuj Churi gashkada rikuchishka gaga.

⁵Jesucristomundami Paidasirvichun agllushkash kachushkash gasha, jatun kushida japigani. Tuki llaktagunabi Paidasirvichun ch'ikunyachishka gachun kayashkaguna ganguichi. ⁷Tuki mashnalla Romabi gaj Dios k'uyashkagunalla, Diosbujlla gachun kayashkaguna: ñukuchij Taita Diosbuj

shinaidi Mandaj Jesucristoj kushka alligunash k'uilla kausish kangunan gachun.

Pablo rikungu ringu munashkamunda

⁸Kallaringaudijka ñuka Diostaga, Jesucristoj shutibi tuki kangunamunda ‘Diosolopai’ niguni; illujta kai pachabiga kanguna Diosta crishkadaga alli parlashkagunami. ⁹Paibuj Churimunda Alli Shimida parlusha ñuka tuki shungumunda sirvishka Diosmi ima urash na kungarishalla kangunamunda Paida mañagushkadash alli yachan. ¹⁰Diosta mañagushami Paibuj muni gakiga kunun maidikish kangunada rikungu ringu ñanguna paskarichun p'unllandijta mañagunilla. ¹¹Kanguna jinchi crijkuna gachun, Diosbuj Espiritumunda japishkada yachachingajmi kangunada manchanaidi rikungu munani. ¹²Ashtan laru ningajka, kangunash ñukash chi Dioslladadi crishkamunda kaishuj chaishujkun ñaubujmu katina yuyin kushiyankungajmi gan.

¹³Wauki paniguna, kaida yachachunmi munani, tauga kutinmi kangunada rikungu ringu munagani; shina gakash kunungamami trankaguna rikurighuskalla. Chimu rishaga ima layami shuj llaktagunabi japigani, shina layaidi kangunapurabibish granoda shina tandachingu munani. ¹⁴Griegogunamush na griegogunamush,^a yachujkunamush na yachujkunamushmi dibijma laya gani; ¹⁵shinushami ñukaga kanguna Romabi kausujkunamush Alli Shimida parlungu manchanaidi munani.

Alli Shimiga poder gashkamunda

¹⁶Ñukaga Alli Shimimundaga nalladi pinganachinichu; chi Shimiga Diosbuj poder gashkamundami tuki mashnalla crijkunadaga kishpichingaj gan; kallarimunga israelgunamu, chi k'ipaga na israelgunamushmi gan. ¹⁷Ñukuchida ima juchachinash illajta Dios rurashkadami kai Alli Shimiga rikuchin; chiga crishkallamundami gan. Dios escribichishkabi nishka shinaga,

“Juchachinash illujka crishkallamundami kausanga.”^b

Tukiguna juchayuj gashkamunda

¹⁸Diosga tuki na alli rurushkadash genteguna milligunada ruru-shkadash Pai p'iñarishkadaga jawa pachamundami rikuchin; na allida rurushami kabishka shimida jarkusha charinguna. ¹⁹Diosmunda ima yachanaga paigunamunga rikunallami gan, Dioslladimi rijsichiga.

^a **1.14** Griegogunash romanoguna layaidi manchanaidi yachuj gente nisha rijsirishkagunami gaga. Tuki chaishuj llaktamundagunadaga imash na yachuj gashkabimi charijkunaga.

^b **1.17** Kai Habacuc 2.4bi nishkaga kashna nishkash gai pudinmi: “Crishkamundaga juchachinash illuj tukusha kausanga.”

²⁰ Diosmunda imalla na rikibujkunadash Pai rurashkada rikushaga yachi chayi pudinmi; kai pachada rurushkamunda pacha Paiga ima uragamash Dios gashkadash tukida ruri pudishkadash larulladimi rikunchi. Shinusha paigunaga ‘Na yachashkanichu’ ningumallash na pudinchu. ²¹ Diosta rijshshka jawash ‘Alli k'uilla Diosmi gangui, Diosolopai’ nishamallash na nigagunachu. Ashtangarin imash na vali yuyashkallabi yuyasha, paigunaj naidi uyush nij shungush yanamanga tukuga. ²² ‘Alli yachujkunami ganchi’ nigushash, ashtan muspagunami tukuga. ²³ Shinami ima urash na wañuna Diosta, ‘Alli k'uillami gangui’ nina randiga ashtangarin musrhagunada ruruhaga wañujlla gentegunama, pishkugunama, chusku chakiyujkunama shinaidi culebrama layagunada ‘Allimi gangui’ ningu ruragaguna.

²⁴ Shinusha milli na alli yuyiguna paigunaj shungubi tiyashkagunan katichunllami Diosga sakiga, shinami paigunapuraidi kikinbuj cuerpolladadi pinganaidigunada ruragaguna. ²⁵ Diosbuj kabishka parluda na uyush nisha ashtan llagmashkadami crigaguna; Tukida Ruruja kazuna randiga Pai rurushkagunadami allibi churasha ‘Allimi gangui’ nigaguna. Diosllami tuki ratugama ‘Alli’ nishka gana gan. Shina gachun.

²⁶ Shinushami paigunaj pinganaidi munashkagunada rurachun Diosga sakiga; paigunapuramunda warmigunashmi k'arin siririnada na munasha warmipuralladi na rurana gashkada rurugaguna. ²⁷ Shinaidimi k'arigunash warmin siririnada ña na munushami paiguna manchanaidi rupaguj shina munigunallada rurusha k'arigunapura pinganaida ruranukujkunaga. Millida rurashkamundaga paigunallabidimi llakida japina gashkadaga japigaguna.

²⁸ Paigunalladi Dios tiyashkadash na uyanachikimi, na ruraganunada rurachun milli yuyigunan gachun Diosga sakiga. ²⁹ Tuki laya na alli ruraganunan, milligunada ruranan, charij ganaida munanan, na rikunachisha p'iña yuyigunan jundami ganguna. Shujkunajta munusha wañurijkuna, wañuchijkuna, p'iñanukunaida munajkuna, jawalla shimin crichijkuna, shujkunamunda na alli yuyijkuna, washalla rimujkuna, ³⁰ p'iñusha shujkunada juchachijkuna, Diosta p'iñajkuna, na kazuj tukushkaidijkuna, alabarijkuna, jatun tukushkaidijkuna, millida rurungu yuyarinukujkuna, taita mamadash na kazush nijkuna, ³¹ uyiti na uyungu munajkuna, ari nishash na p'aktachijkuna, pimundash k'uyida na sintijkuna, pimundash na llakirijkuna, ³² shina rurujkunaga Dios llakichisha wañuchishka ganaidimi kabin; paigunaga shina Dios mandashkada alli yachushka jawash na rurushamallash katinllagunachu, ashtangarin shujkuna shinaidi rurukish kushillami rikunguna.

Diosga kabishka juchachij gashkamunda

2 ¹ Shinusha, kan pi gashash shujkunada juchachigushtijka ‘Jucha illujmi gani’ ningujka naidij pudinguihu. Ima layami chaishujkuna

ruran shinaidimi kambish rurangui. Chimundami shujkunada juchachishaga kanlladi juchachishka gangujmi shinaga rurangui. ²Ashtangarin shina rurasha kausujkunadaga Dios kabishkadadi juchachij gashkadami yachanchi. ³¿Shujkunada juchachigushash kambish paiguna rurushkalladadi ruragushaga ‘Dios juchachinamundaga mitikushami’ yuyanguichu? ⁴Dios manchanai allí shunguyuj gashkada, shinaidi na ut’kada p’iñarishalla shuyagushkadaga ¿yangabichu churangui? Juchada sakisha Paimu kuchuyachun nisha kangunga allí shungu gashkadaga ¿nachu yachunguiri? ⁵Kangarin ima rurashkamunda na llakirij jinchi shungu gashami, Dios p’iñarishkash shinaidi kabishka juchachinash rikurina p’unllagama kanllamundi Pai p’iñarishkada mirachisha tandachigungui. ⁶Tukigunamumi imalla rurashkamunda Diosga kuna gashkalladadi kunga. ⁷Dios ‘Alli’ nishka gangu, allibi churashka gangu shinaidi naidi wañunada mashkusha allida ruragujllaganamunga na tukurij kausidami kunga. ⁸Shina gakash maijinbish kikinbuj munushkaida rurusha, kabishkada kazuna randi na allí ruranallada kazujkunamunga, Pai colerasha p’iñarishkanmi llakichinga. ⁹Tuki na allida rurujkunadaga israelgunadadij chi k’ipa na israelgunadashmi manchanaidi llakish mancharinash japinga. ¹⁰Shinash ashtangarin allida rurujkunamunga israelgunamundij chi k’ipa na israelgunamushmi Dios ‘Alli’ nishka ganada, allibi churashka ganada shinaidi k’uilla kausidash kunga. ¹¹Diosmunga yalli allí nishkagunamaga pish na tiyanchu.

¹²Moisés mandushkada na yachusha juchada rurajkunaga chi mandashka illukishmi tukiguna juchachishka chingangaguna; shinaidi mandashkada charishka jawash juchada rurujka chi mandashkallandimi juchachishka ganga. ¹³Mandushkada uyushkallanga Diosbuj ñaubuki ‘Alli’ nishkaga na gai pudinchu, ashtangarin chida kazujkunallami ima juchachinash illujkuna ganga. ¹⁴Mandashkagunada na charij na israelgunaga munashkamundadi mandashkabi nishka shina rurashaga mandashkagunada na charishash paigunalladimi mandashkagunama laya tukun. ¹⁵Paiguna rurushkanga chi mandashkaguna shungubi escribishka tiyashkadami rikuchinguna;^c shungubi ima yuyashkami chidaga yachi chayachin; chilladimi wakinbiga ‘Na allí rurangui’ nisha juchachinga, shuj kutingunaga ‘Alli rurangui’ nishami ninga; ¹⁶kashna nishkagunan juchachina p’unllabiga Diosga tukigunaj pakashka yuyigunada Jesucristomundami juchachinga; Allí Shimida ñuka parlushka shinami ganga.

Israelgunamundash Moisesbuj mandushkamundash

¹⁷Kan ‘Israelmi gani’ nishami ‘Moisés mandashkadash charinimi, Dioskumbish allimi gani’ nisha jatun tukusha puringui. ¹⁸Pai munashkadash

^c 2.15 Dioslladimi chi mandashkagunadaga tukigunaj shungubi escribij shina churan.

yachunguimi, Moisés mandashkada yachushkamunda allida ruranadash agllungakish yachanguimi. ¹⁹Na rikujkunadash shinaidi yanamangabi gajkunadash p'unllayachij shina kanlladi pushuj gashkadami yuyangui. ²⁰'Mandashkabiga imalla yachanagunadash kabishka parlushkagunadash illujtami charini' nishami imadash na yachujkunadash mara shina-gunadash yachachij gashkada cringui. ²¹Shina gakash kan shujkunamu yachachishaga ¿nachu kanllamundikish yachachingui? 'Na shuwanachugun' nigushtijka ¿imasha shuwangui? ²²'Na wainayanachu' nigushtijka ¿imasha wainyangui? Musrhagunada p'iñaj gashadjika ¿imashti chi musrhagunada 'Alli' nina wasigunamunda shuwangui? ²³Mandashkada charishkamunda jatun tukushtijka ¿imashadi mandashkada na kazusha Diostaga rimachingui? ²⁴Diosbuj Shimibi nishka shinaga, "Na israelgunaga kangunaj kauzamundami Diosbuj shutida imakish na valichisha rimanguna," nin.^d

Circuncidashka gashash mandashkagunada kazunamunda

²⁵Mandashkada kazuj gashtijka, aicha karada p'itichishkaga^e valingaidimi; ashtanbish ima urami mandashkada kan na kazushaga kikinbuj aicha karada p'itichishkash na p'itichishkama layami tukungui. ²⁶Ashtangarin aicha karada na p'itichishka gashash mandushkabi kabishka ruranagunada kazujtaga ¿nachu Diosga aicha karada p'itichishka shinalladadi japinga? ²⁷Aicha karada p'itichishka gashash mandashka escribishkagunada charishka jawash kan na p'aktachikiga cuerpobi karada na p'itichishka gashash mandashkada p'aktachijmi kanda juchachinga. ²⁸Israelguna kausashka shina rikuchishkallan, shinaidi aicha karada p'itichishkallanga na israeldjika gai pudinchu. ²⁹Israel ganagarin kikinbuj uku shungumundami gana gan, aicha karada p'itichishkash shungumundami gana gan; na mandusha escribishkallamundachu, chidaga Diosbuj Espiritumi shina rurun. Maijin shina gajka, na genteguna 'Alli' nishka gancho, ashtan Diosmi 'Alli' nishka gan.

3 ¹Shina gacidijka, israel ganash na gashaga circuncidashka ganash ¿ima allibujti gangari? ²Manchanaidi alli, tuki layamundashmi. Kallarimunga, Diosga israelgunamumi Paibuj shimida mingashka. ³Shinakiga ¿ima tukun? ¿majinguna na crishkallamundachu Diosga 'Ari' nishkadaga na p'aktachingari? ⁴Shinadjika na gangachu; tuki genteguna llagma gakash, ashtangarin Diosga kabishkada rurujmigun, escribichishkabi tiyashka shinaga,

“Kan ima nishkabish kabishkada ruruj gashkadami rijsingaguna,

^d 2.24 Is 52.5 ^e 2.25 Españolbiga circuncisión nin. Israelgunaga Dioskun ari ninukushkada yuyaringajmi shina rurujkunaga. Circuncisionda ruranaga pusuj p'unllayuj marada ullu umaj aicha karada p'itichishkadami nin.

juchachigukish vincinguimi.”^f

⁵Nukuchij na allí rurashkagunan Dios kabishkada ruruj gashkada rikuchin; shina gakidijka ¿imadadi nishunshi? ¿Diosga ñukuchida llakichishaga na kabishkada rurujchu imashi? (Kaidaga gente layallami parlaní.) ⁶¡Nalladij shinachugun! Shinadi gakiga ¿ima layadij Diosga kai pachamundagunadaga ‘Kauzayujmi, na kauzayujchu’ nisha juchachinga?

⁷Shina gakash nishunchilla, ñuka llagmagushkamunda Diosbuj k'uilla gashkada rikuchun Pai kabishkada parlushkaga laruidi gakidijka ¿imashadi ‘Juchayujmigun’ nisha ñukadaga juchachin? ⁸Shinadi gakiga “¿na allidaga imashadi na rurusha katigushunllari alliguna shamuchunga?” ‘Shinami yachachin’ ningunami; ñukada na allibi sakichingu munushami maijngunaga shina juchachinguna. Shina rurujkunaga juchachishka gaganaga kabinlladimi.

Kabishkada rurujka shujllash na tiyashkamunda

⁹¿Imada nishun shinakiga? ¿Ñukuchi israelgunaga, chaishujkunada yalli alligunachu ganchi? ¡Naidi shinachugun! Israelgunash na israelgunash tukiguna jucha mandushka kausagushkadaga ña rikuchishkanchimi.

¹⁰Escribishkagunabi tiyashka shinaga,

“¡Kabishkada rurujka shujllash na tiyanchu!

¹¹Alli intindijkish pillash na tiyanchu;
Diosta mashkujkish pillash na tiyanchu.

¹²Tukigunami na allí ñanmu rishkaguna;
tukigunami imash na intindijkuna tukushka;
¡pillash na tiyanchu allida rurungujka!
¡Shujllash na tiyanchu!^g

¹³Paigunaj tunguriga pantion ut'ku shina paskushkami gan;
k'alluga llagmashallami parlan.^h
Paigunaj shimibiga culebra venenomi tiyan.ⁱ

¹⁴Paigunaj shimiga shujkunada
‘Na allí tukushkanmu’ ningau jundami;
shinaidi jayuj shungugunami gan.^j

¹⁵Paigunaj chakigunash pidash wañuchingajka apuruidimi rin;
¹⁶paigunaj ñan purishkabiga illujta p'akishtasha llakibimi sakinguna;
¹⁷shinaidi shujkunana k'uilla kausana ñandaga na rijsingunachu.^k

¹⁸Diosta manchanadaga paigunaj yuyibiga nalladi charingunachu,^l
ninmi.

¹⁹Shinakiga kununga, ñukuchi yachushka shinaga illujta mandashkabi nishkagunadaga mandashka ukubi kausajkunamumi chidaga nin; tukigunaj

^f 3.4 Sal 51.4 ^g 3.12 Sal 14.1-3; 53.1-3 ^h 3.13 Sal 5.9 ⁱ 3.13 Sal 140.3 ^j 3.14 Sal 10.7

^k 3.17 Is 59.7-8 ^l 3.18 Sal 36.1

shimiguna ichkarichunbish tuki kai pachabi kausajkunada Dios juchachishka gachunbishmi shina nin. ²⁰Mandashkagunada p'aktachishkamundaga maijinlladash ima juchachinash illujtaga Diosga na rurunchu; ashtanbish mandashka tiyashkamundaga juchayuj gashkadami yachi chayanchi.

Crishkallan ima juchachinash illuj tukunamunda

²¹Kununga shinakiga, mandushkagunada ch'ikunyachisha ima juchachinash illuj tukunadami Diosga rikuchishka, chidaga mandashkagunabish Dios nishkada parlujkunash^m ñami yachi chayachishkaga. ²²Diosga, Jesucristoda crishkamundami, tuki crijkunadaga ima juchachinash illujta ruran. Tukiguna igulmi gan. ²³Tukiguna juchada rurushkamundami Dios k'uilla gashka shina ganamunga na chayi pudinguna.ⁿ ²⁴Shinash Jesucristo randisha kishpichishkanmi Diosga paigunada k'uuyushkallamunda ima juchachinash illujta yanga ruran. ²⁵Jesucristodaga Paibuj yaurda jichushkada crikimi juchagunada p'ichushtajta^o Diosga churaga. Diosga kabishkada ruruj gashkada rikuchingajmi na ut'ka p'iñarishalla ñaubamu ima jucha rurashkagunadash imash na nishalla sakiga. ²⁶Diosga shina rurushkanmi Pailladi kabishkada ruruj gashkada kunun p'unlla rikuchingaj jucha illuj gashkadash, shinaidi Jesusta maijin crijtash ima juchachinash illujta ruruj gashkadash rikuchin.

²⁷Shinakiga, jatun tukusha parlanaga ¿maibidi sakirin? Anchuchishkami sakirin. ¿Imamundashi? ¿Mandashkada p'aktachishkamundachu? Mana. Ashtangarin crishkallamundami gan. ²⁸Tuki kaigunada yuyarishaga gentegunadaga, na mandashkagunada p'aktachishkamundachu, ashtanbish crishkallamundami Dios ima juchachinash illujta rurushkada yachi chayanchi.

²⁹Na gashaga ¿Diosga israelgunabujlla Dioschu gan? ¿Nachu na israelgunabukish gan? Shinadimigun, na israelgunabukishmi. ³⁰Shuj Diosllami tiyan; kikin charishka aicha karada p'itichishka gakish crishkamundami, na p'itichishka gakish crishkallamundami Diosga ima juchachinash illujta ruran. ³¹Shinakiga ¿crishkamundachu mandashkagunada yangabi churanchi? ¡Nalladi shinachugun! Ashtangarin chi mandashkagunada 'Allimigun' ninchi.

Abrahamga alli crij gashkamunda

4 ¹Shinadijka ¿imada nishun? Aichamunda rikukiga ñukuchij ñauba taita Abrahamga ¿imadadi japiga? ²Abrahamga ima rurashkamunda

^m 3.21 Mandashkagunabish Dios nishkada parlujkunash nishaga illujta Ñauba Testamento-da nishami nigun. ⁿ 3.23 Shujtij yuyin traducishkakiga kashnami ninmu: Diosbuj k'uilla gashka ñaubujmundaga chairijti karullabidimi ganguna. ^o 3.25 Cristo p'ichushtajta nishkamunda 1 Juan 2.2 ura chakibi yachachishkadash rikungui.

juchachinash illuj gakiga ‘Allimini’ ninaga kabinlladimumiga. Shinash Diosbuj ñaubukiga na shinachu. ³Shinaidi Dios escribichishkabiga ¿imada nin?

“Abrahamga Diostami criga,
shinushami Diosga ima juchachinash illujmada shina japiga,”^p
ninmi.

⁴Kununga shinakiga, maijin trabajajmunga pagana gashkadaga kumbidagushkama shinaga na yuyanachu, ashtangarin dibishkama layami gan. ⁵Shina gakash, juchayujkunada ima juchachinash illujta ruruj Diosta maijin crijtaga, ima allidash na ruruj gakash, Paida crikimi Diosga ima juchachinash illujmada shina japin. ⁶Diosga maijingunadaga ima rura-shkagunadash na rurushkama layada japisha juchachinash illujta rurusha kushiyachishkadaga Rey Davidlladikish parlugami, ⁷kashna nisha:

“Milli rurashkagunada Dios perdonasha juchagunadash tapachishkagunadijka ¡pachun kushiyarinami!

⁸Maijinbuj juchagunadaga, Manduj na juchachishka gashadijka ¡pachun kushiyachishkami gan!”^q

⁹Kai shina kushiyarinaga ¿circuncidashkagunajllachu ganga? Na gashaga ¿na shina rurarishkagunakishchu ganga? Diosga Abrahamdaga crishkallamundami ima juchachinash illujta japishkadaga ña nishkanchimi. ¹⁰Shina gakidijka ¿ima uradi shina rurushka? ¿Abraham aicha karada p’itishka k’ipachu, na gashaga ñaubarijtadichu? Ñaubarijtadimiga; na k’ipachuga. ¹¹Crishkallamunda paidaga ima juchachinash illujmada shina Diosga ñami japishkaga; chida rikuchingajmi selloda churashka shina Abrahamga k’ipamu aicha kara p’itishka gaga. Shina rurushami aichada na p’itichishka gakash Abrahamga tuki crijkunaj taita tukushka, shinami paigunadash ima juchachinash illujmada shina Diosga japin. ¹²Shinaidi Abrahamga tuki mashnalla, aichada p’itichishka gashka jawash, pai crishka shinada rikusha katijkunaj taitami; chi crinadaga narikish aichada p’itishka gashaidimi ñukuchij ñauba taitaga ña chariga.

Crishkan ‘Kushami’ nishkada japinamunda

¹³Diosga Abraham-mush wawagunaj wawagunamush ‘Kai pachada japij gachun kushami’ nishka. Shinash kai japina gashkaga na mandushkada p’aktachishkamundachuga; ashtangarin criki juchachinash illuj shinada rurashami ‘Kushami’ nishkaga. ¹⁴Shinakiga mandashkada p’aktachijkunalla ‘Kushami’ nishkada japina gakidijka, crishkash yangami, shinaidi Dios ‘Kushami’ nishkash, imakish na vali shinami tukunmu. ¹⁵Mandashkagunaga Dios p’iñarishkadami apamun. Shina gakash maibimi mandashka na tiyan, mandashkada p’akinamash na tiyanmuchu.

^p 4.3 Gn 15.6; Stg 2.23 ^q 4.7-8 Sal 32.1-2

¹⁶Shinushaga Abraham-mu ‘Kushami’ nishkaga, tuki paibuj wawagunaj wawagunamu, rurarishkaidi gachunga crishkallamundami gan; shinami Diosga na kuna gakish k'uyushkallamunda kumbidan. Kai ‘Kushami’ nishkaga mandashkada charijkunajllaga na ganchu, ashtangarin Abraham laya crijkunamushmi gan; shina rurukimi tuki ñukuchibujka paiga taita gan. ¹⁷Dios escribichishkabi nishka shinaga, “Kandami tuki laya llaktagunamunda gentegunaj taita gachunmi churashkani,”^r ninmi. Abrahamga Diosbuj ñaubuki shina nikiga wañushkagunada kausachij shinaidi ima narij tiyashkagunadash tiyachun nij Diostami criga.

¹⁸Tuki laya llaktagunamunda gentegunaj taita gangujka, tuki shuyagushkash naidi p'aktana laya gakishmi Abrahamga ashtan crish katisha shuyaga, Dios ña kashna nishka shinaga, “Kambuj wawagunaj wawagunaga taugalladjkunami ganga.”^s ¹⁹Abrahamga ña patsuj (100) watada p'aktachimuguj gashkada, yuyijyasha ña wañunalla gashkardash cuenta kusha, shinaidi Sarash marada na chari pudij gaki, paibuj crishkaga jawayaj shina na tukugachu. ²⁰Shinaidi Dios ‘Kushami’ nishkada ‘¿Kungachu? ¿nachu kunga, imashi?’ nishamash na crishkama layaga na yuyugachu. Ashtangarin Diosta ‘K'uillami gangui’ nisha ashtandi jinchi crina yuyidami japiga. ²¹“ ‘Kushami’ nishkadaga p'aktachingajka ruri pudijmigun,” nisha chi yuyillan criga. ²²Shina crishkamundami Diosga ima juchachinash illujmada shina japiga.

²³‘Juchachinash illujmada shina japiga’ nishaga na Abrahamllamundash escribigachu; ²⁴ñukuchimundashmi chibi escribiga. Ñukuchida Mandaj Jesusta wañushkagunapuramunda kausachij Diosta crikinga, ñukuchidash shina layalladadimi japinga. ²⁵Jesustaga ñukuchij juchagunamunda wañuchunmi Diosga kuga, shinaidi ñukuchida ima juchachinash illujta rurangaumi kausachiga.

Jesucristomundami Dioskun alli tukushkanchi

5 ¹Paida crishkamunda Diosga ñukuchida ima juchachinash illuj shinada ñami japiga; shina gakiga ñukuchida Mandaj Jesucristomundami Dioskun alli tukushka kushi kausanchi. ²Shinushaga Paimundami crishkallamunda kununga Dios k'uyushkamu waigui pudishkanchi, shinami Pai k'uyashkabi gagunchilla. Dios k'uilla gashka shina gangu shuyagushami manchanaidi kushiyanchi.^t ³Na kaillashchu, ashtangarin llakigunada apashkamundash kushiyanchi, chi llakigunami na shaikurishalla jinchi katijkunada rurashkardash yachanchi. ⁴Shina jinchi katishkanmi Dios valichishkagunadi gashun; chi valichishkanmi shuyana yuyilla gashun. ⁵Kai shuyagushkaga na pinganaibi sakingachu.

^r 4.17 Gn 17.5 ^s 4.18 Gn 15.5 ^t 5.2 Romanos 8.18-25bi kai yachimunda ashtallandi yachachisha katin.

Ñukuchimu kushka Diosbuj Espiritumundami Diosga Paibuj k'uyida ñukuchij shungubi jundachij shina tallishka.

⁶Cristoga ñukuchilladi naidi kishpiringu pudibuj gakimi, Pai wañuna p'unlla p'aktuki juchayujkunamunda wañuga. ⁷Kabishkada ruruj gentej randi wañungajka shujmallachari wañush ninmu. Shina gakish allida rurujmundaga shujmallash wañungu na mancharinmushchhari. ⁸Ashtanbish kaibimi Diosga ñukuchida k'uyuj gashkada rikuchin: ima ura chairijtj juchayujkuna gakimi Cristoga ñukuchimunda wañuga. ⁹Kununga shinakiga, Cristo yaurda jichashkan Dios ima juchachinash illujta rurashka k'ipadijkarin Dios p'iñarisha llakichinamundaga Paimi ñukuchida kishpichinga. ¹⁰Diosga chairitij Paida p'iñajkuna gakish, Paibuj Churi wañushkan Paigun ñukuchi alli tukuchunmi shina ruraga; shina gacidijkarin Paigun ña alli tukushka gashkamundaga Pai kausuj gacidimi kishpichishka gashun. ¹¹Na kaillashchu, ashtangarin ñukuchij Manduj Jesucristomundami Dioskun alli tukusha Diosbi manchanaidi kushiyanchi.

Adanmundash Cristomundash

¹²Shinushaga shuj k'arillamundami kai pachabiga juchaga waiguga, chi juchallamundadimi wañish waiguga; shinusha tukiguna juchada rurushkamundaga wañiga tukigunamumi chayaga. ¹³Moisés mandashkaguna narij tiyajllabidimi, juchadaga kai pachabi ña ruragaguna; shinash mandashka na tiyakiga jucha rurushkadash imash na nishkami gan. ¹⁴Shina gakish, Adanbuj kausimunda kallarisha Moisesgamaga wañiga mandagugallami. Dios mandushkada Adán p'akishka shina na p'akishash paiguna juchada rurushkamundaga wañugagunami. Paiga shamungu Gajta rikuchijmiga.^u

¹⁵Shinash Adán jucha rurushkan ñukuchimu Dios kumbidashkanga na ch'imbapuribujmi; shuj k'arilla juchada rurushkamundami taugalladijkuna wañuga. Ashtanbish Dios kumbidashka alligunadaga shujlla k'ari Jesucristomundami na kuna gakish kushka; chiga taugalladijkunabujka ashtandi yalli allimi gan. ¹⁶Shinaidi Dios kumbidashkaga chi k'ari juchada rurushka shinaga na ganchu. Kabishkada nikiga shuj juchallamundami Dios juchachisha llakichinaga shamuga. Shina gakish Dios kumbidashkagarin taugalladi juchagunamundami ima juchachinash illujta rurungu shamushka. ¹⁷Shuj k'arilla juchada rurushkamunda wañi mandagun; shina gacidijka ashtandi yallishmi Dios manchanaidi k'uyasha alligunada kusha ima juchachinash illujmada shina japishkagunagarin, kausibiga shujlla k'ari Jesucristomundami manduj shina kausangaguna.

^u 5.14 Shamungu Gajka Jesucristomi. Adán juchada rurashami wañidash apamuga; Jesugarin juchada anchuchisha mushuj kausida kujmi gan.

¹⁸Shinushaga ima layami shujlla juchada rurashkamunda tukigunada llakichina tukuga, shinaidi shuj kabishkallada rurushkamundami tuki-guna ima juchachina illuj tukusha kausida japinaga tiyan. ¹⁹Shinaidi ima layami shuj k'ari na kazushkamunda taugalladijkuna juchayuj tukuga, shina layaidimi shuj k'ari kazushkamundami taugalladijkuna Dioskun alli tukungaguna.

²⁰Jucha rurashkaguna ashtan mirarichunmi mandashkadaga churaga. Jucha ashtan mirarikiga Diosga Pai k'uyasha kushka alligunadaga ashtallandijmi mirachiga. ²¹Shinushaga ima layami juchaga wañimu pushangaj manduga, shina layaidimi Dios k'uyashkaga mandagun Paigun alli tukujkunada rurusha ñukuchida Mandaj Jesucristomunda na tukurij kausida kungaj.

Juchada rurungu ña wañushka gashkamunda

6 ¹Shinakiga ¿imadadi nishun? Dios k'uyagushka ashtandij mirarisha katichunga ¿juchada rurusha katigushunllachu? ²¿Nalladi shinaga ruranchu! Ñukuchiga juchada rurungaj ña wañushkaguna gashadijka? ¿ima layadi chillatijka rurusha kausagushunllari? ³Cristo Jesusbi mashnalla bautizarishkaguna, bautizarishkan Paiyundi wañushkadaga ¿nachu yachanguichi? ⁴Bautizarishaga Criston tandanukushka gasha ñukuchikish wañusha Paiyun pambushkami gaganchi; ima laya Taita Dios Paibuj k'uilla gashkada rikuchisha Jesusta kausachiga, shinaidi ñukuchish mushuj kausibi purichunmi ruruga.

⁵Pai wañushka layaidi wañusha Paiyun tandanukushkaguna gashadijka, Cristo kausarishka layaidimi kausachishka gashun. ⁶Ñukuchij ñauba kausiga Criston cruzbi chakatashka gashkadaga yachanchi. Ñukuchida jucha mandashka shina^w ama ashtan katichunmi juchasapa aicha chingachishtashka gachun rurushka gaga. ⁷Maijinsh wañushaga ña na jucha mandushka kausanchu. ⁸Criston ñukuchi wañushka gashadijka, Paigunlladi kausana gashkada crinchimi. ⁹Cristoga wañushkagunapuramunda kausarishka k'ipa kutinga ña na wañuna gashkada yachanchimi; wañish Paida kutinga ña na mandungachu. ¹⁰Ima ura Cristo wañushaga tukigunaj juchamunda tuki ratuj shuj kutinllami wañuga, ashtanbish kausarishaga Diosbujllami kausagun. ¹¹Shina layaidi kangunash juchabujka wañushka shina gashkada yuyichi, ashtanbish Jesucriston tandanukusha Diosbujta rurungu kausuj gashkada yuyichi.

¹²Shina gakiga, juchadaga kangunaj wañujlla cuerpobiga na alli muni-gunada rurachisha mandusha katichun ama sakinguichichu. ¹³Kangunaj

v 6.2 Jesucristoda krijkunaga juchada kununmunda pacha ama rurush katingumi ñukuchigachibujka wañushkama shina tukuganchi. w 6.6 Juchabuj watushka shina gashka nin. Ro 6.17

cuerpobi imalla charishkagunada millida rurachichunga juchamu ama kuichichu. Chibuj randiga wañushash kutin kausachishka shina kikinlladadi Diosmu kurisha cuerpobi imalla charishkagunada Diosbuj ñaubuki kabishkada ruraj gachun sakichi. ¹⁴Kununga Moisés mandashkagunaga ña na kangunaj jawabi ganchu, ashtangarin Diosbuj k'uyibimi kausaganguichi. Shinusha juchaga kangunabi imallada rurachina poderdaga ña na charingachu.

Kabishkada rurungu watashka gashkamunda

¹⁵Shinadijka, Moisés mandashkaga ña na ñukuchij jawabi gaki, ashtangarin Diosbuj k'uyibi gashkamundaga ¿juchada ruragushunllachu? ¡Naidi shinadijka ruranachugun! ¹⁶Alli yachushka shinaga kanguna sirvingaj shuj mandujmu k'aturishaga paida kazungajmi watushka shina tukunguichi; wañimu apaj juchamu k'aturikish, na gashaga ima juchachina illujta rurachun Diosta kazungu gakash shinaidimi tukun. ¹⁷Shina gakash ñaubami kangunaga juchabuj watushka shina gashash, Diosmunda ima laya crinada kangunamu yachachikimi tuki shungun kazushkanguichi. Chimundami Diostaga 'Diosolopai' nini. ¹⁸Juchada ruranamunda ña kacharichishka gashami, kununga kabishkada ruranaj watushka shina tukushkanguichi. ¹⁹Kanguna chairijtij narij ratu japijlla gakimi rijsishka shimigunan nini. Sarun kangunaj cuerpo illujtada k'aturij shina millanai na alli tuki laya juchadash rurasha kazungaj kuganguichi. Shina layaidi kununga kabishkada rurasha Diosbujlla pish na juchachibuj kausungau k'aturij shina kikinbuj cuerpo illujtada kuichi.

²⁰Kanguna chairijtij juchabuj watushka shina gashami, kabishkada rurungujka na watashkaguna gaganguichichu. ²¹Shinadijka, kununga tuki chi rurushkagunamunda pinganachinguichimi; ¿ima allidadi japiganguichiri? Tuki chigunaga wañimumi apan. ²²Shinaga juchada ruranamunda ña kacharichiki kununga Diosbujta rurungumi watushaguna tukushkanguichi; Diosbujlla pish na juchachibuj kausanamu apasha, chibuj jawa, na tukurij kausimu apakimi kaiga manchanai kangunaj allibuj gan. ²³Juchada rurushkamunda japinaga wañimi, ashtanbish Dios kumbidashkaga ñukuchida Mandaj Cristo Jesusbi na tukurij kausimi gan.

Kazarashkagunan ch'imbapurushkamunda

7 ¹Wauki paniguna, Moisés mandashkagunada yachunguichimi; shinushaga chi mandushkagunaga kausujkunallada mandi pudij gashkadaga ¿nachu yachunguichi? ²Kazarashka warmiga mandushkabi nishka shina kusa kausushkagama paillamu watushka shinami gan, shinash wañukiga kusan watushka shina gachun mandashkamundaga ña kachachirishkami sakirin. ³Shinushaga kusa kausagujllabidi shuj k'arin gashaga, wainayaj nishkami ganmu. Shina gakash kusa wañukiga,

warmiga mandushkabi nishka shinaga ña na kusabuj ganchu, shinusha shuj k'arin kazarashash na wainayaj ganchu.

⁴Shinaidi k'uyashka wauki paniguna, ima urami Cristoj cuerpo wañukiga kangunash mandashkabujka wañushka shina gaganguichi; wañushka k'ipa kausachishka gajkun tandachishka gangabujmi shina rurushka. Shina gashami Diosmunga alli granuda tandachisha kuj shina kushun. ⁵Ima urami ñukuchij aicha munushkabi kausaguganchi, mandashkabi nishkagunaga ñukuchibi tiyaj na alli munigunadami rijchachijkunaga, chida kazushaga wañilladami japiganchi. ⁶Shina gakash mandashkabi watashka shina gasha wañushami kununga mandushkamunda kacharichishka ganchi; shina kacharichikimi ña na ñauba mandushkagunallabidijka ashtanbish Diosbuj Espiritumunda mushuj kausibi Paidá sirvinchi.

Ñukabi tiyaj juchamunda

⁷¿Imada nishun shinadijka? 'Mandashkaga juchamigun' ¿nishunchu? ¡Nalladi shinachugun! Shinash mandashka na tiyashkakiga juchaga ima gashkadash na yachanimuchuga; mandashkabi nishka layaga, "Shujbujta ama munangui,"^x na nishkakiga, shujbujta muniidash na munanimuchuga. ⁸Shina gakash juchami paibuj alli ganaj mandashkaguna tiyashkan ñukamunga tuki laya milli munanagunada rijchachisha munachiga; mandashkaguna illukiga juchash wañushka shinami ganmu. ⁹Ñauba p'unllaguna ñukaga mandashkaguna illuj kausuganillami; shinash mandushka shamuki juchaga kausarigallami, ñukaga wañugani.^y ¹⁰Shinami, kausimu pushanabuj gashash chibuj randiga chi mandushkaguna ñukadaga wañimu pushaj gashkada yachi chayagani. ¹¹Juchami paibuj alli ganaj mandashkaguna tiyashkan pandachisha chigunallandi ñukada wañuchiga.

¹²Alli alli yuyarikiga, Moisés mandashkash tuki mandushkagunash ima juchash illujmi, kabishkashmi shinaidi allishmi gan. ¹³Shina gakidijka ¿kai alli gashkachu wañimu ñukada pushuga? ¡Nalladij shinachugun! Ashtangarin juchami juchadi gashkada rikuchingau alli mandashkan wañimu pushaga; kununga mandashkaguna tiyashkamunda juchaga yallimanaidi milli gashkadami rikuchishka gaga.

¹⁴Kai mandashkaga Espiritumunda gashkadaga yachanchimi, shinash ñuka aicha munida ruruj gashkamundaga juchada ruranañ k'atushka shinami gani. ¹⁵Ñuka imamunda shina rurushkadash na yachanichu; ima rurungu munushkadaga na ruranichu, shinash ashtangarin naidi rurungu

^x 7.7 Ex 20.17; Dt 5.21 ^y 7.9 "Ñukaga wañugani" nishkadaga ni pudinchichari: Pabloga, "Ima na allidash na ruranichu" nisha pai k'uilla sintishkaga ña chibi wañushka shina chin-garishkadami nisha nigun.

munushkadami rurani. ¹⁶Ñuka, na rurungu munushkadadi ruragushaga, mandashkadaga ‘Allimi gashka’ ninimi. ¹⁷Shinakiga, na allidaga ña na ñukaga ruranichu; ashtangarin ñukabi tiyaj juchami chidaga rurachin. ¹⁸Allida ruranaga ñukabi, ñukaj aichabiga na tiyashkadaga allimi yachani; allida rurana muniguna ñukabi tiyakish rurungujka na pudinichu. ¹⁹Allida rurungu munushkadaga na ruranichu, ashtangarin na rurungu munushka na allidaga chidadimi rurani. ²⁰Na rurungu munushkadadi rurushtijka, ña na ñukaga ruranichu; ashtangarin ñukabi tiyuj juchami chidaga rurachin.

²¹Kununmi kashna tukushkada yachi chayani: allida rurungu munuj gakash na allida rurana munigunashmi ñukabiga tiyan. ²²Ñukaj shungu ukubiga Diosbuj mandashkagunanmi kushiyani; ²³shinash ñukaj cuerpo-bi charishkagunabiga shujtij mandagushkadami rikuni; ñukaj yuyibi alli mandashkagunan takanukusha ñukaj aicha ukubi gaj juchada rurachij mandashkaga ñukada prezu charij shinami charigun.

²⁴¡Shinapadijka imachari tukusha! Wañimu apaguj ñukaj cuerpomundaga ¿pidij kacharichingari? ²⁵Ñukuchida Manduj Jesucristomundami Diosta ‘Diosolopai’ niguni. Shinusha alli alli yuyarikiga, Dios mandushkadaga ñukaj yuyinga kazujmi gani; ashtanbish ñuka cuerponga jucha rurachun mandashkadami kazuni.

Diosbuj Espiritun kausanamunda

8 ¹Kununga shinakiga, Jesucriston tandanukushka gajkunamunga ima juchachinash ña na tiyanchu. ²Jesucristobi kausida kuj Espiritu mandashkami ñukadaga juchada rurachij shinaidi wañimu apaj mandashkamunda kacharichiga. ³Shinash genteguna imallabish juchada rurujlla gakimi Moisés mandashka na ruri pudishkadaga Dioslla ruruga. Juchamunda Paibuj Churidadi kushka gachun shinaidi juchada rurachij aichayujmada layada rurushami Paidakachuga; Diosga aichabi tiyaj juchadaga tukuchishtashka gachunlladimi shina ruruga. ⁴Mandashkabi nishka kabishka ruranaguna ñukuchibi p'aktachunmi shina ruruga; ña na aicha munushka shinaga, ashtangarin Espiritu munushka shina kausanchi. ⁵Aichallamunda gajkunaga aicha munushkagunaidami rurungu yuyanguna; ashtanbish Diosbuj Espirituj kausujkunaga Espiritu munushkagunaidami yuyanguna. ⁶Aichabujllada yuyusha kausanaga wañimumi apan, ashtangarin Espiritujllada yuyusha kausanaga k'uilla kausimumi apan. ⁷Aichabujllada rurana yuyin gajkunaga Diosta p'iñajkunami gan; paigunaga Dios mandashkada na kazungunachu; kazungu munashash na pudingunachu. ⁸Shinusha, aichabujllada rurusha kausujkunaga Diostaga na kushiyachi pudinichu.

⁹Shina gakash kangunaga Diosbuj Espiritu kangunabi kausakiga ña na aicha munushka shina kausanguichichu; ashtangarin Espiritu pushashka

shina kausanguichi. Maijnbish Cristoj Espirituda na charijka na Cristobujchu. ¹⁰Shinash Cristo kangunabi kausakiga Dios ima juchachinash illujta rurashkamunda kangunaj espiritus kausan,^z ashtanbish cuerpo-ga juchada rurashkamunda wañunallami gan. ¹¹Jesusta kausachijbuj Espiritu kangunabi kausakiga, maijinmi wañushkagunapuramunda Cristoda kausachiga, chilladimi kangunaj wañuna cuerpogunamush kausida kunga; kangunabi kausuj Paibuj Espiritumundami shina ruranga.

¹²Shinakiga wauki paniguna, p'aktachinadadimi charinchi; shinash chi p'aktachinaga aicha munushka shina kausanabiga na ganchu. ¹³Aicha munushka shina kausushaga, wañunguichimi; ashtanbish Espiritun aicha munushka ruranagunada wañuchishaga, kausunguichimi.

¹⁴Diosbuj Espiritu tuki mashnalla pushushka gajkunaga Diosbuj wawagunami gan. ¹⁵Kangunaga watushka charij espiritudaga na japishkanguichichu kutin manchin gangujka; ashtangarin Diosbuj wawada ruruj Espiritudami japiganguichi. Pai nichikimi Diostaga wakush nisha, “¡Abba, ñuka Yayalla!”^a nisha mañanchi. ¹⁶Kai Espiritulladimi ñukuchij espiritun tandanukusha Diosbuj wawagunadi gashkada yachi chayachin. ¹⁷Paibuj wawaguna gashami japina gashkada Diosmunda japishun, Cristo layaidi llakida apasha Paigun igulda Diosbuj k'uilla gashkadami japishun.

K'ipamu k'uilla ganamunda

¹⁸Kai kausibi apashka llakigunaga, Dios ñukuchida shamuj p'unllabi 'K'uilla alli' nishkada rikuchinashkan ch'imbapurakiga imash na ganchu. Kaidaga yachanimi. ¹⁹Diosbuj wawaguna ima shina gashkada rikuchina p'unllagama tuki imallada Dios rurashkagunaga ña rikuna yuyillanmi shuyagunguna. ²⁰Shinash Dios rurushkagunaga imash na valij yangabimi sakishka gaga; na paiguna munushkamundachuga, ashtangarin Dioslladimi shina rurushkaga, kashna tukuchun shuyagushami: ²¹Dios imallada rurushkagunalladimi maugusha tukurinabujti watashkagunaga kacharichiki 'K'uilla alli' nishka ganamu Diosbuj wawaguna layaidi, kachachirishka gangu shuyagun. ²²Wachanachij warmi shina, imalla Dios rurashkagunaga kunungama chairitij jiguisa nanachigujtash yachunchimi. ²³Na paillash llakirinchi, ashtangarin ñukuchi mashnalla ñaubusha Diosbuj Espirituda japijkunash Paibuj wawagunadadi rurangama chi yuyillan shuyagushallami chairitij shungu ukullabidi jiguij shina llakirinchi. Chibimi ñukuchij cuerpomundaga illujtadijka kishpichishka gashun. ²⁴Chi shuyagushkanmi kishpichishka gaganchi, shinash ima shuyagushkada ña rikushaga na shuyagushka tukunchu; ña

^z 8.10 'Kangunaj espiritus kausan' na gashaga 'Diosbuj Espiritush kangunaj kausimi gan' nishkaga intindiri pudin. ^a 8.15 'Abba' nishkaga arameo shimimunda gan; yayunda k'uyushami shina nijkunaga. Jesús Taita Diosta k'uyusha Paidaga shinami nin. Mc 14.36; Gl 4.6

rikushkadaga ¿pidij shuyangari? ²⁵Ashtanbish narij rikushkada shuyagushaga, na shaikurishalla chi yuyilla shuyagunchilla.

²⁶Shina layaidimi Diosta mañashaga ima laya mañanashkadash na alli yachushkamunda ñukuchi jawalla pandarijllaguna gaki Espíritu ayudan; Pailladimi jiguisha na ni pudishka shimigunan ñukuchimunda Diosta mañagun. ²⁷Diosgarin shungubi ima yuyashkada illujta yachuj gashami Espíritu ima nisha nigushkadash yachun; Dios munushka shinami Espirituga Diosbujllagunamunda mañagujlla gan.

Tukida vincijkuna gashkamunda

²⁸Diosta k'uyajkunabujka imallagunash pasushaga paigunaj allibuj gashkadami yachanchi; kaiga Pai munushkada p'aktachichun kayushkagunamumi gan.

²⁹Diosga ñaubamundadi Pai rijsishkagunadaga Paibuj Churimu rijchujkuna gachun ch'ikunyachiga; tauga waukigunamunda Paiga kallari Churi gachunmi chidaga ruruga. ³⁰Pai ch'ikunyachishkagunadaga kayugashmi; chi kayushkagunadaga ima juchachinash illujta rurugashmi; ima juchachinash illujta rurushkagunadaga k'uilla ganabishmi churaga.

³¹¿Imada ashtanga kaimunda ni pudinchi? Dios ñukuchin gakiga ¿pidi ñukuchidaga na allida rurungari? ³²Diosga kikinbuj Churidadi tuki ñukuchimunda wañuchun, na mitsarishalla kujlla gashadijkarin ¿imashadi Churin igulda tuki imalla tiyashkadash ñukuchimunga na kungari? ³³Dios agllashkagunadaga ¿pidij 'Kauzayujmi' ni pudingari? Dioslladimi ima juchachinash illujta ruruj gan. ³⁴¿Pidij juchachingari? Jesucristomi wañuga, ashtangarin kausarishaga ñukuchimunda mañusha Diosbuj alli ladubimi tiyan. ³⁵¿Cristoj k'uyimundaga imadij ñukuchida anchuchi pudingari? ¿llakichikichu, ima manchichu, katik'ichushkachu, yarijichu, churana illukichu, imash tukunalla gashachu, espadachu? ³⁶Dios escribichishkabi nishka shinaga,

“¡Maijin p'unllash Kanmundaga wañuchishka gai pudinchi! ‘Wañuchingabujmi’ nishka ovejagunada layami ñukuchida charinguna.”^b

³⁷Shina gakash ñukuchida K'uyujmundami tuki kaigunabiga vincijkunadimi ganchi. ³⁸Kaidaga allimi yachani: wañish kausish, angelgunash ayada mandujkunash poderyujkunash, kunun p'unllash shamuj p'unllash, ³⁹jawabidi gashash ukubidi gashash, shinaidi Dios rurashkagunamunda ima shujtijkunabish, ñukuchida Mandaj Jesucristobi rikuchishka Diosbuj k'uyimundaga nalladi karuyachi pudingachu.

Diosga Pai munushkagunada agllan

9 ¹Criston gashkamundami kabishkada parlani, na llagmanichu. Diosbuj Espíritu pushaki shungubidi yuyachishkamundash

^b 8.36 Sal 44.22

kabishka gashkada yachanimi. ²Manchanaidi llakirishami p'unllandijta ñuka shunguga nanachigunlla. ³Ñukaj waukigunamunda ñukajti llaktallamundagunaj allibuj gakiga ñukalladi Cristomunda laduyachishka 'Imash tukushkanmu' nishka gangau munanimuchari. ⁴Paigunaga israelgunami. Dios Paibuj wawagunadi tukuchun japishkagunami gan; Paibuj k'uilla gashkada, ari ninukushkagunadash, mandashkagunadash, ima laya Diosta adoranadash, Dios 'Kushami' nishkagunadash paigunamumi kushkaga. ⁵Rijsirishkaidi ñauba taitagunamunda shamujkunami gan, shinaidi Cristoga aicha tukushaga paigunapurabimi wachariga; imalla tiyashkadash Pailladimi manduj Dios gan; ima urash na tukuringagama 'Alli' nishka gachun. Shina gachun.

⁶Kununga shinakiga 'Dios nishkaga na p'aktushkachu' nishaga na ninichu; ashtangarin Israelbuj wawagunaj wawagunaga na tukiguna israelgunajtika ganchu. ⁷Shinaidi Abrahambuj wawagunaj wawaguna gashkallamundaga na tukiguna paibuji wawaguna ganchu, ashtanbish Diosmi, "Kambuj wawagunadijka Isaacmundami shamunga,"^c niga. ⁸Kaida rikusha yuyarikiga, aichallamunda wawagunaga Diosbuj wawaguna na ganchu, ashtangarin Dios 'Kushami' nishkamunda shamuj wawagunallami Paibuji wawagunadi tukunguna. ⁹Diosga Abraham-mu 'Kushami' nishkaga kaimi gan: "Shamuj wata kunun shina p'unllagunalladi shamushami. Chigama Saraga shuj churidami charinga."^d

¹⁰Shinash na kaillachugun, Rebecabuj ishki churigunaga chi taitamundalladimi gaga; ñukuchij ñauba taita Isaacbumiga. ¹¹⁻¹²Chi churiguna narij wacharisha shinaidi allidash na allidash narij rurujllabidimi Diosga Pai agllungu munushkaga p'aktushka chibi gaguchunlla Rebecadaga, "Ñauba churiga k'ipa churidami sirvinga,"^e niga. Na paiguna imalla rurashkamundachu, ashtangarin Diosti kayashkamunda shina nishkaga. ¹³Dios escribichishkabi nishka shinaga, "Jacobdami k'uyagani, ashtanbish Esaúdaga p'iñaganimi,"^f niga.

¹⁴¿Imada ni pudinchi? ¿Nash kabishkadachu Diosga ruruj gangari? ¿Na shinachugun! ¹⁵Diosga Moiestaga, "Ñukaga llakibi gajta k'uyusha nisha k'uyushallami; maijinmunda llakirisha nishash llakirishallami,"^g niga. ¹⁶Shina gakiga, na maijinsh munashkamundachu, imalladash rurushkamundachu Diosga llakin, ashtangarin Pai k'uyashkallamundami llakin. ¹⁷Dios escribichishkabiga Egiptoda mandaj Faraonmu ninmi, "Yallidijka, Ñuka tukida ruri pudishkada rikuchingaj shinaidi kai illujta

^c 9.7 Abrahamga shuj churigunadashmi chariga, Ismaeldash shinaidi Génesis 25.1-6bi parlashkagunadash. Shinash Isaacmi warmindij charishka churi, shinaidi 'Kushami' nishkadash japij gan. ^d 9.9 Gn 18.10 ^e 9.11-12 Gn 25.23 ^f 9.13 Mal 1.2-3 ^g 9.15 Ex 33.19

pachabi Ñuka shutiga yachi chayachishka gachunmi kandaga jatun mandajta rurugani.”^h

¹⁸Shinakiga Dios maijindami llakingu munan, chidami llakin; shinaidi maijindami shunguda llumiyachingu munun, chidami llumiyachin.ⁱ

¹⁹Shina gakiga ñukadaga, “Paibuj munidaga ¿pidij jarki pudingari? Shina gakidijka ¿imashadi juchachin?” nisha tapungu munanguimuchari. ²⁰Riki, kanga Diosta shina tapungaujka ¿pidi ganguiri? ¿Achpamunda mangada rurujtaga mangaga, “¿Imashadi ñukadaga shinada rurugangui?” ningachu? ²¹Mangada rurujka achpamunda pai munushkada ruranaga ¿nachu kabin? Chillamundadimi shuj mangadaga allibujkish, shujtaga imallabujkish charingaj ruri pudin.

²²Diosga shina layaidi rurusha Pai ruri Pudij gashkadash p'ñarishkadash rikuchish nishash, Pai llakichisha tukuchishtanalla gajkunada na ratu p'ñarishalla gushtulla shuyaga. ²³Pai yallimainaidi k'uilla gashkada ñukuchibi rikuchingaujmi, llakingu ruruhkagunamu shina ruraga; Pai chigunada shina k'uillada rurungu ñaubamundadi yuyashkaga. ²⁴Shinakiga ñukuchidaga israelgunapurallamundaga na kayagachu; ashtanbish na israelgunapuramundashmi kayaga. ²⁵Oseas librobi nishka shinaga,

“Nash Ñukajkunadami, ‘Ñukajkunalla’ nisha;

Shinaidi nash k'uyashkadami ‘Ñuka k'uyashkalla’ nisha.”^j

²⁶Maibimi paigunada, ‘Na Ñukajkunachu ganguichi,’ nigani chi pushtullabidimi,

‘Kausuj Diosbuj^k wawaguna’ nishka gangaguna.”^l

²⁷Isaiasga israelgunamundaga,

“Israelbuj wawagunaj wawagunaga jatun yaku kuchabi tiyaj achpa shina taugalladijkuna gakash p'ichillagunami kishpichishka gangaguna.

²⁸Mandajka kai pachabi Pai imalla nishkada ñallami illujta p'aktachin-ga,”^m nishkami.

²⁹Shinaidi Isaías ñaubamu nishka shinaga,

“Tukida Manduj jatun Dios ñukuchimu wawagunaj wawagunada na sakishkakiga

Sodoma pueblo shinami ganchimu, Gomorra layashmi rikurinchimuga.”^{n o}

³⁰¿Imada nishun kaimunda? Na israelgunaga jucha illuj ganada na mashkushash ima juchachinash illujmi tukuga; Diosta crishkamundami shina tukushkaguna. ³¹Ashtanbish israelgunagarin mandashkabi

^h 9.17 Ex 9.16 ⁱ 9.18 Ex 7.3 ^j 9.25 Os 2.23 ^k 9.26 ‘Kausuj Dios’ nishaga kabishkadi Diostaga ruruhkalla na kausuj dioskuna shinaga na ganchu nishami nin. ^l 9.26 Os 1.10
^m 9.27-28 Is 10.22-23 ⁿ 9.29 Is 1.9 ^o 9.29 Dios llakichishtashkamunda chi ishki pueblogunaga uyarishkaidijkuna gaga. Gn 19.1-28

nishkada rurashkan ima juchachinash illuj ganada mashkashash na japi-gagunachu. ³² ¿Imasha na japi-gaguna? Crishkamamundaga na gagachu, ashtangarin rurushkagunallan japisha nishkamundami; trankarina rumi-bi trankarisha urmugaguna. ³³ Kashnami Dios escribichishkabiga nigun, “Rikichi, Sionbiga^p trankarina rumida, urmachichij rukudi rumida-mi churani, shinaidi maijinsh Paibi yuyida churajka pinganaibiga naidi sakichishka gangachu.”^q

10 ¹ Wauki paniguna, israelguna kishpichishka gachun shungundijta munushkallamundami Diosta mañagunilla. ² Paiguna Diosbujta rurungu munushkadaga ‘Allimigun’ ni pudinimi; shinash paiguna rurushkaga kabishkadadi yachushkamundaga na ganchu. ³ Dioslla ima juchachinash illujta rurushkadaga na yachush nisha, shinaidi kikin rurushkagunallan Paiyun alli tukush nishami, juchachina illuj tukuchun Dios yachachishkadaga na kazushkagunachu. ⁴ Mandashkagunada illujta p'aktachijka Cristomi gan, Paiga tuki crijkunada ima juchachinash illujta ruraga.

⁵ Mandashkagunada p'aktachishalla ima juchash illuj tukunamundaga Moisesga kaidami escribiga: “Maijinsh mandushkabi nishkagunada p'aktachijka chigunamundami kausanga.”^r

⁶ Crishkallamunda Dios ima juchachinash illuj tukunamundagarin kaidami nin: “Kambuj shungubi, ¿Jawa pachamunga pidij ichiyangari? nisha ama yuyanguichu.” (Shina nigushaga Cristoda jawamunda uriyachingu rishka shinami nin). ⁷ Na gashaga, “ ¿Pidij jatundi ut'kumunga uriyangari? nishash ama nichu,” ninmi. (Shina nigushaga wañushkagunapuramunda Cristoda ichiyachiguj shinami nin.)^s

⁸ Shinadijka ¿imadadi nin? “Diosbuj Shimiga kambuj kuchubi, kambuj shimibi shinaidi kambuj shungubimi gan,” ninmi. ^t Ñukuchi parlagushka kai alli crina shimiga kaimigun: ⁹ Kambuj shimin, “Jesusga ñukada Mandujmi,” nisha wañushkagunapuramunda Dios Paida jatarichishkada kambuj shungun crishaga, kishpichishkami gangui. ¹⁰ Ima juchachinash illuj tukungujka shungunmi crinagun, kishpichishka gangujka kikinbuj shiminmi ‘Crinimi’ ninagun.

¹¹ Dios escribichishkabiga, “Mashnalla Paibi yuyida churajka pinganaibiga naidi sakichishka gangachu,”^u ninmi. ¹² Israelgunash na israelgunash shina layagunaidimi gan. Chi Mandujlladi tukigunada Manduj gashami

^p 9.33 Juan 12.15 ura chakibi Sión nishkamunda yachachin. ^q 9.33 Is 28.16

^r 10.5 Lv 18.5 ^s 10.7 Pabloga, Cristoda jawamunda na gashaga uramunda kutin puchanaga na ministirishkadami nisha nigun. Ñukuchi ima juchachinash illuj tukuchunga Cristoga ñami tukida rurushka. Paida crinalla ministirin. Ro 10.9-10; Dt 30.11-13

^t 10.6-8 Dt 30.12-14 ^u 10.11 Is 28.16

Paida mañujkunamunga milgalladadi kunadami charin. ¹³Shinami, “Tuki mashnalla Mandujbuj shutibi mañujtaga kishpichishkami ganga,”^v nin. ¹⁴Shinakiga, Paida narij crishaga ¿ima layadi mañungagunari? Paimunda parlushkada narij uyushaidijka ¿ima layadi cringagunari? Paimunda parluj pish na tiyakiga ¿ima layadi uyungagunari? ¹⁵Na kachukiga ¿ima layadi parlungagunari? Dios escribichishkabi nishka shinaga, “¡Alli parlu da apamujkunaj chakigunaga manchanaidi k'uillami!”^w

¹⁶Shinash Alli Shimidaga na tukigunachu kazugaguna. Isaiasga, “Mandaj ¿ñukuchi parlashkadaga pidi crishkari?”^x ninmi. ¹⁷Shina gakiga crinaga parlushkada uyukimi shamun; chi uyashkaga Cristomunda parlashkami gan.

¹⁸Ñuka kaida tapuni: parlushkadaga ¿naidijchu uyushkagunanga? ¡Ari, uyugunadimi! Dios escribichishkabiga,

“Chigunaj parlarishkagunaga tuki kai pachabimi uyarishka, shinaidi paigunaj shimiguna kai pacha tukuri pushtugunamumi chaya-shka,”^y ninmi.

¹⁹Kaidashmi tapuni: ¿israelgunaga naidijchu yachi tukushkagunanga? Kallarimumi Moisés escribishkabiga,

“Munachingajmi nash Ñukajkunan shinaidi imadash na yachujkunan kangunada p'iñachisha,”^z ninmi.

²⁰Chi k'ipa, Isaiasgarin na manchushalla kashnami nishka,

“Nash mashkujkunami Ñukada japigaguna, Ñukamunda nash tapujkunamumi rikurigani.”^a

²¹Shinash Israel pueblomundaga paiga,

“Ñukada na kazuj shinaidi jinchi tukujkunan alli tukungaj tuki p'unllami makida rikuchigunanilla,”^b ninmi.

Maijin israelgunallada kishpichinamunda

11 ¹Shinushaga kutin tapuni: ¿Diosga Paibujti puebloda shitashkachu ganga? ¡Naidi shinaga ganchu! Ñukaidikish israelmi gani; Abrahambuj wawagunaj wawa, Benjaminbuj tribumundashmi gani.^c

²Ñaubamu agllashka Paibujti pueblodaga Diosga na shitashkachu. Dios escribichishkabi Eliasmunda ima nishkadaga ¿nachu yachunguichi? Paiga Diosta mañagusha israelgunada juchachishaga, ³“Mandajlla, Kan ima nishkada parlujkunadash wañuchishkagunami; Kanmu kusha rupachina altargunadash p'akishtashkagunami. Ñukallami kausin sakirini, ñukadash wañuchisha nigungunami,”^d niga. ⁴Ashtanbish shina niki Diosga

^v 10.13 Jl 2.32 ^w 10.15 Is 52.7 ^x 10.16 Is 53.1 ^y 10.18 Sal 19.4 ^z 10.19 Dt 32.21

^a 10.20 Is 65.1 ^b 10.21 Is 65.2 ^c 11.1 Ñauba taita Jacob-buj chungu ishki churigunamunda cada churij wawagunaj wawaguna shuj tribu nishka tukuga. Gn 37.23-26; Ap 7.4-8

^d 11.3 1Re 19.10,14

¿imadadi nin? “Baal^e shuti diosbuj ñaubuki na kungurij kanchis waranga (7.000) gentegunadami Ñukamu ch'ikunyachisha wakichishkani,”^f niga. ⁵Shina layaidi kununbish Pai alligunada kusha agllashkagunaga p'ichilla-gunami tiyan. ⁶Na kuna gakash alligunada kusha paigunada agllukidijka, imada rurashkamundaga ña na ganchu; allida rurashkamunda gakiga ña na Dios alligunada kumbidashkamunda tukunchu.

⁷Kununga ¿imada ni pudinchi? Israelgunaga japingu munushkada na japigagunachu; shinash Dios agllashkagunaga japigagunami. Ashtanbish chaishujkunadaga jinchi shungudami ruruga. ⁸Dios escribichishkabi nishka shinaga,

“Diosga paigunamu muspayachij espirituda kushami kunun p'unllagama ñawigunada na rikujta, rinringunada na uyajta ruruga.”^g

⁹Rey Davidbish kashnami nin,

“Paigunaj ima jatun mikigunabiga tsagnarisha tugllabi^h japi tukusha urmushaga llakichishka gachun.

¹⁰Paiguna ama rikuchun ñawigunash ansayachun, shinaidi tuki ratugama paigunaj lomogunash tursirichun.”ⁱ

Na israelgunash kishpichishka gashkamunda

¹¹Kununga tapuni: ¿israelguna trankarishaga ña na jataringauchu urmushkanga? ¡Nalladi shinaga ganchu! Ashtangarin, munachisha p'ñachingajmi israelguna Diosta na kazushkamundaga na israelgunamu kishpichishka gana shamuga. ¹²Shinaidi paiguna na kazushkamundaga kai pachamundagunabuj manchanaidi allibujmi gashka, paiguna pandarishkaga na israelgunabuj manchanaidi allibujmi gashka; shinakidijka israelgunada illujta kishpichikigarín ¿nachu ashtandij yalli allibuj ganmuri?

¹³Kununga kanguna na israelgunamu nisha nini: ñukaga na israelgunamumi Diosmunda parlachun agllusha kachushka gani; chimundami ñuka Diosbujta ruranadaga manchanaidi allibi churani. ¹⁴Shina rurushkanga ñukajti llaktallamundadigunada ima layash munachisha maijingunalladash kishpichichingu pudishachari. ¹⁵Kai pachabi kausujkuna Dioskun alli tukuchun israelgunada llujshichishtashka gakidijka Dios paigunada japishagarín wañushkagunada kausachishka shinami ganga.

¹⁶Kallarimu llujshishka tanda Diosmu ch'ikunyachishka gakiga illujta chapushkashmi Diosbujlladi ganga; shinaidi yura sapi Diosmu ch'ikunya-chishka gakiga tuki ramagunashmi Diosbujlladi ganga.^j

^e 11.4 Baal mushhaga Israel muyundiki tiyujkunaj diosmiga. Tamiash tarbushkash chi mursha kuj gashkadami yuyusha taugaguna katijkunaga. ^f 11.4 1Re 19.18 ^g 11.8 Dt 29.4; Is 29.10 ^h 11.9 Tuglla nishaga shuj trampama layadami nisha nigun; animalda japingumi tuglladaga shuj waska puntabi rinrinda ruranguna. ⁱ 11.9-10 Sal 69.22-23 ^j 11.16 Kallarimu llujshishka tandamunda shinaidi yura sapimundash nigushaga israelgunaj ñauba rijisirishkaidi taitagunadami nisha nigun.

¹⁷Olivo yuramunda maijin ramagunada rauchushtashka shinami gaga; kangunagarin, sachabi ñashka olivo yuramunda ramada p'itisha chaisujukunaj randi llutachish churashka shinallami ganguichi. Chimundami kangunaga alli olivo yura sapibuj k'uilla ikillamunda kausida charinguichi. ¹⁸Shina gakash chaisuj ramagunada 'Yallimi gani' nisha ama yuyanguichichu. Shina nigushamaga kaida yuyari: yura sapidaga na charirijchungui, ashtangarin sapimi kandaga charirigun.

¹⁹"Ñukada chi yurabi llutachisha churungajllami ramagunadaga rauchushtashka," ningumachari. ²⁰Shinaidimi gan. Paiguna na crishkamundami rauchushtashka shina gagaguna; ashtangarin kangunaga crishkallamundami chi yurabi alli tiyarishkanguichi. Shinushaga 'Yallimi gani' nisha ama nichu, ashtangarin manchuj gai. ²¹Diosga chi yurallabidi ñushka ramagunadash na perdonajtijka kandagarin na perdonangachu.

²²Shinakiga, Diosga allida ruruj shinaidi jinchi gashkadash yurachi; na allibi urmujkunadash llakichingaj jinchimi, shinash kangunanga alligunaida rurujmi gashka. Kanguna Paibuj alli rurigunamunda na karuyashalla kausagüichilla; karuyashaga p'itishkashkami ganguichi. ²³Israelgunash na crishkada sakikigarin, Diosga tukida ruri pudij gashkamundaga kutin chillabidi llutachisha churungallami. ²⁴Kangunaga sachabi ñashka olivo yuramunda p'itishka, naidi chimunda gakash alli olivo yurabi llutachisha ñachishka shinami ganguichi; shinakidijka alli olivo yurabujti ramagunadaga kikinbuj yurallabidimi Diosga llutachisha kutin churungallami.

Israelgunada kutin mushujyachisha kishpichinamunda

²⁵Wauki paniguna, kanguna yachuj tukushkaidi ama gachunmi kai pakalla tiyashkada yachachun munani: crij tukuna gaj na israelguna tukiguna crij tukungamallami maijin israelgunaga llumiyashka shungu tukushkagunaga. ²⁶Chi k'ipaga, tuki israelgunadami Diosga kishpichinga, Dios escribichishkabi nishka shinaga,

"Sionmundami Kishpichijka shamunga; Paimi Jacob-buj na alli rura-shkagunada^k anchuchinga.^l

²⁷Ñuka paigunan ari ninukushkadaga paigunaj jucha rurushkagunada chingachishami p'aktachisha."^m

²⁸Kangunaj allibujlladimi israelgunaga Alli Shimida na japishkamunda Dioskun p'ñanukushka shina ganguna, shinash paigunaj ñauba taitagunada agllushkamundaga chairitij Dios k'uyashkagunamigun. ²⁹Diosga imada kushash na kichunchu, agllushkadash naidi anchuchinchu. ³⁰Ñaubamunga Diosta na kazujukunami gaganguichi, shinash israelguna na

^k 11.26 Jacobda nishaga, paibuj wawagunaj wawaguna na gashaga tuki israelgunadami nigun. ^l 11.26 Is 59.20-21 ^m 11.27 Is 27.9

kazush nishkamundami kanguna kununga Dios llakishka tukushkangui-chi. ³¹Kanguna layaidimi paigunash kunun na kazushkaguna; kanguna Dios llakishka tukushkamunda paigunash chi llakishkalladadi japi-chunmi shina tukushka. ³²Illujta yuyarikiga Diosga tukigunada llakisha igulda k'uyangajmi na kazujkuna gachun tukigunada chibi chaririaga.

³³¡Diosga yuyisapa tukida manchanaidi yachujmi! Pai imada yuyashka-dash pish na rijsi pudinchu, ruragushkadamash pish na yachi tukunchu.

³⁴“Manduj Diosbuj yuyidaga ¿pidij rijsishkari? na gashaga alli yuyi-gunada kujka ¿pidij tiyagari?” ³⁵¿Pidij ñaubushadi Paimu imadamash kushkanga, chimunda randi Pai vueltachichunga?”^o

³⁶Tuki ima tiyashkagunash Paimundami shamun, Paimundami tiyan, Paimumi tiyan; shinushaga ¡Diostraga ima urash na tukuringama ‘K'uillami gangui’ nishka gachun! Shina gachun.

Diosbujlla kausanamunda

12 ¹Shinushaga wauki paniguna, Dios manchanaidi llakij gashkamunda kaida rugani: kangunaj cuerpogunadaga k'uilladij, ima juchash illuj, wañuchishkada Diosmu kuj shina Paillamu kausujta kurichunmi mañani. Shina rurushaga Diosta kabishkadi allibi churajkuna ganguichi. ²Kunun p'unlla genteguna layaidijka ama gaichichu, ashtangarin kangunaj yuyida Dios mushujyachishkan uku shungumunda shujti tukichi; chibimi alli, k'uidij, ima pandarishka illuj ruranadaga Dios munushkada yachi chayanguichi.

³Dios ñukamu alligunada kusha mingashkamundami tuki kangunada kaida nini: kikinllamundadijka ama ashtan yalli yuyusha, yuyanashkaida yuyachun; ashtangarin shuj shujmu crina yuyida Dios kushkada alli rikusha ima laya gashkada kikinlladi yuyarichun. ⁴Ima layami shuj cuerpobiga tauga partigunada charinchi, shinash na tukigunaga chi ruranalladadijka ruranchu, ⁵shina layaidimi ñukuchikish taugaguna gashash Cristobiga shuj cuerpolla gancho; shina gashami kaishujkun chaishujkun shuj cuerpobujlla gancho.

⁶Na kuna gakash kushka shujtij shujtij ruranagunada Dios kumbidashkagunadami charinchi: Dios nishkada parlachun mingusha kumbidashkakiga, ima layami crin, shina layaidi rurachunlla; ⁷shujkunada sirvij ganada kumbidashkakiga shina ruraguchunlla, yachachij ganada kumbidashkakiga shina yachachiguchunlla, ⁸crina yuyida shujkunamu kusha kushiyachinada kumbidashkakiga shina ruraguchunlla, shujkunamu ima ministishkada kuj gashaga na mitsushalla kuchun, mandusha pushaj ganada kushkakiga yuyillandi alli mandachun, ministijkunada llakisha ayudajka kushilla rurachun.

ⁿ 11.34 Is 40.13; 1Co 2.16 ^o 11.35 Job 41.11

Crijkuna ima laya kausanada mandushkamunda

⁹Kaishujkun chaishujkun na nij tukushalla k'uyanukichi. Na alli ruranada millasha, llutarij shina allida rurangaj ashtan kuchuyichi.

¹⁰Kikinbuj waukindijma shina kaishujkun chaishujkun k'uyanukichi, allibi churanukusha randimunda alli ninukichi.

¹¹Yuyillandi ganabiga ama killanachijkuna gaichichu, ashtangarin Manduj Diosbujta rurungu manchanaidi rupariguj shina rurichi.

¹²Mandajbi shuyagushkamundaga kushiyichi, llakigunabi gasha apagüichilla, Diosta mañanadaga amalladi sakichichu.

¹³Diosbujkunapurabi ministijkuna tiyakiga kuinukichi; kambuj wasimu chayujkunada kushilla japijkuna gaichi.

¹⁴Kangunada katik'ichujkunada 'Alligunada Dios kuchun' nichi; 'Llakibi urmushkanmu' nisha ama nichichu.

¹⁵Kushilla gajkunanga kushikuichi, wakagujkunanga wakichi.

¹⁶Kaishujkun chaishujkun shuj yuyilla gasha kushilla kausichi, ama alli tukushkaidi gasha ashtanbish yanga nishka gentegunan apanukujkuna gaichi. Kikin yuyushkallabi 'Yachujmi gani' nisha ama yuyichichu.

¹⁷Maijinsh ima na allida rurakiga na allillandijka ama veltachichichu, tukigunaj ñaubuki allida ruranada mashkichi. ¹⁸Kangunallabidi tiyagarin tukigunan alli gangaujka pudishkada rurichi. ¹⁹K'uyashka wauki paniguna, na allida rurukiga chillandijka ama veltachichichu, ashtanbish Dioslladi llakichichun shuyichi. Escribichishkabiga, "Mandajka ninmi, 'Na allida rurujkunada llakichinaga Ñukajmi kabin; Ñukami kunashtakadaga kusha,' " ninmi.^p ²⁰Ashtanbish, "Kanda p'iñajka yarijin gakiga mikuchun kari, yakunachigukish ubiachun kui; kashna rurushaga rupaguj murugunada paibuj uma jawabi tandachij shina rurangui,"^q ninmi.^r

²¹Na allida rurana yuyiguna vincichun ama sakichu, ashtanbish na allidaga allida rurushkan vinci.

13 ¹Tukigunami jatun mandujkuna mandushkada kazuna gan; Dios na churushka mandajkunamaga na tiyanchu, ña mandagujkunash Pai churashkagunaidimi gan. ²Shina gakiga mandajkunada maijin k'arinijka Dios churashkagunadami k'arinin. Maijin shina rurujkunaga llakichishka ganadaga japingagunaidimi. ³Mandajkunaga allida rurujkunada manchachingujka na tiyungunachu, ashtangarin na allida rurujkunadami shina rurunga. ¿Mandujkunada na manchushalla kausungu munanguichu? Allida ruri, allidami kanmundaga parlanga. ⁴Maijin mandujka kambuj allibujmi Diosta sirvij gan. Shinash na allida kan rurashaga mancharinaidimi gangui; espadadaga alliidijmaga na

^p 12.19 Dt 32.35; Heb 10.30 ^q 12.20 "Shina nigushaga pinganallabidi sakichishkadami nigung," nishami, tauga yachajkuna yachachin. ^r 12.20 Pr 25.21-22

apanchu, paigunaga Diosbujta rurujkuna gashami na allida maijin rurujtaga llakichina gashkada llakichin. ⁵Shinushaga mandajkunadaga llakichinallamundaga na kazunachu, ashtanbish kikinbuj yuyibi, kazunaga alli gashkamundashmi kazuna gan. ⁶Chillamundadimi impuestodash pagajkuna ganguichi; mandujkunaga Diosbujta rurujkuna gashami p'unllandijta shina mandagunguna.

⁷Tukigunamu kunashkadaga kuichi: mandajkunamu pagana gakiga paguichi, impuestoda pagana gashaga impuestomunda kuichi; maijinda kazuna gakash kazichi, 'Allimi gangui' nina gakash 'Allimi' nichi.

⁸Imadash ama pimush dibijkuna gaichichu, ashtanbish kaishujkun chaishujkun k'uyanukunaida dibijma shina gaichi; maijinbish shujkunada k'uuyjka mandashkabi nishkada tukidami p'aktachishka. ⁹Mandashkagunabiga, "Ama wainyangui, ama wañuchingui, ama shuwangui, shujbujta ama munangui,"^s nishkagunadash chaishuj mandashkagunadash shujllamu tandachikiga ninmi, "Shujkunadash kikinda layaidi k'uuyngui."^t ¹⁰K'uuida charijka shujtaga millidaga na rurunchu; shinusha shujkunada k'uuyushaga mandashkadaga tukidami p'aktachin.

¹¹Tuki kaigunadaga maijin p'unllagunabi kausagushkada rikusha yuyarichi, puñugushkamundash ña jatarina urasmi gan; crishkalla p'unllagunan rikukiga ñukuchida kishpichinaga ña kuchubimi. ¹²Tutaga p'unllayamugunmi, p'unllash ña chayamugunlladimi; shinushaga yanamangabi ruranagunamunda anchurisha p'unllabi takanukungu parijarij shina churarishunchiri. ¹³P'unllabi purij shina allida rurusha kausashunchi. Ama maidash gachun mikushunchiri, ama shingayashunchiri, piyunbish siririjma pinganaida rurujmash ama gashunchiri, p'iñanukibi ama churashunchiri, charij tukuki ama p'iñashunchiri. ¹⁴Chibuj randiga Mandaj Jesucristobi churarij shina gashunchi, aicha munushkaida rurungujka yuyimadash ama yuyajkuna gaichichu.

Crijkunapura na pandachinamunda

14 ¹Narij alli jinchi crijtaga alli japichi, paigunga rimanukigunamu ama waiguichichu. ²Maijin crijkunaga "Tukida imadash mikunallami' ningunami, ashtanbish narij jinchi crijka granugunaidami mikun. ³Tuki layada mikujka na tukida mikujtaga yangabiga na churanachu; shinaidi na tukida mikujkish tukida mikujtaga na juchachinachu; paidash Diosga japishkami. ⁴Shujbuj sirvijta rimungujka ¿kanga pidij gangui? Alli purikish urmakish paida mandajbujmi. Shina gakash jinchimi shayaringa, Mandaj Diosllami alli jinchida shayarichi pudin.

⁵Maijgununaga shuj p'unllami chaishuj p'unlladaga 'Yalli allimi' ninguna; shinash maijgununaga tuki p'unllagunami shinaidijkuna gashkada

^s 13.9 Ex 20.13-17 ^t 13.9 Mt 22.39

yuyanguna. Tukiguna kikin ima yuyushkadaga alli alli gashkada yuyachun. ⁶Maijinsh, shuj p'unllada ch'ikunyachijka Mandajmumi shina rurun. Shinaidi tukida mikujkish Mandajta allibi churangajmi Diosta 'Diosolopai' nishash mikun; na tukida mikujkish Mandajta allibi churangajlladimi na mikun, Diosta 'Diosolopai' nishashmi nin.

⁷Ñukuchipuramunda shujllash kikinllamundijka na kausanchu, wañushamash paillamundijka na wañunchu. ⁸Kausushash Mandajmumi kausanchi, wañushash Mandajllamundimi wañunchi; shinushkamundaga kausagushash wañushash Mandajbujmi ganchi. ⁹Chibujlladimi Cristoga wañushkagunajkish kausujkunajkish Mandaj gangumi wañuga shinaidi kausariga.

¹⁰Shinadijka kanga, chaishuj crijtaga ¿imashadi rimangui? Na gashaga kambish ¿imashadi chaishuj crijtaga yangabi churungui? Dios juez gangu tiyarishka ñaubukiga tukigunami shayarishun. ¹¹Escribichishkabiga kashna nishkashmi tiyan:

“Mandajka ‘Ñukaj kausimundadimi nini,’ ninmi,
 ‘Tukiguna Ñukaj ñaubukiga kunguringaidimi,
 paigunaj k'allunbish tukigunami ‘Kanga Diosmi gangui’
 ningaguna.’”^u

¹²Shina gakiga, tuki ñukuchimi kikin imalla rurashkagunamundaga Diosbuj ñaubuki rikurisha parlashun.

¹³Shinushaga, kaishujkun chaishujkun juchachinukunadaga ña na ruranachunchi, chibuj randiga kambuj waukida ima trankachinada pandachinamada na churushalla ama shina rurungu yuyarichi. ¹⁴Paillamundadijka ima gashash mapallamaga” na tiyanchu; Manduj Jesusta crij gashkamundami chida alli yachani. Shinash imalladash mapa gashkada yuyajmunga paillamumi mapa tukun. ¹⁵Kununga shinakiga kan ima mikushkamunda shuj crij llakiriki, ña k'uyi illuj purishkadami rikuchingui. Kambuj mikunallamunda p'akta shuj crij chingarim; Cristoga paimundashmi wañuga. ¹⁶Shinadijka, kanguna alli ruragushkadaga p'aktalladi na alli nichinguichimu. ¹⁷Diosbuj mandanaga imada ubiyanama mikunamamundaga na ganchu; ashtanbish Diosbuj Espiritumunda kabishkada rurusha, pigunbish na p'iñanukusha, kushilla kausamundami gan. ¹⁸Shina rurushkan Cristoda sirvijka Diostami kushichin, gtegunash 'Allimi gangui' nishka tukun.

¹⁹Shinashkakiga, imadash rurushaga tukigunan na p'iñanukungukish crijkunapura randimunda jinchiyanukungukish rurungu munashunchi.

²⁰Dios ruragushkadaga mikunallamundaga ama tukuchishtichu. Tuki

^u **14.11** Is 45.23 **14.14** Mapalla nishaga Diosbuj ñaubukiga manchanaidi milli gashkadami nin. Mapalla nishkadaga maijin tupaj maijin mikujka paibish Diosbuj ñaubuki mapayashka tukunadami crijkunashka.

mikunami linshudi gan; ashtangarin mikushkan shujkunada urmachishkami na alli gan. ²¹Aichada mikuki vinoda ubiaki imadash ruruki kambuj wauki urmanalla gakiga chida na ruranami alli ganmu. ²²Kai-gunamunda kan ima laya crishkadaga Diosbuj ñaubuki kanllamundimi charina gangui. Maijinsh, crishka shina rurasha kikinbuj yuyi na juchachikiga kushiyachishkami gan. ²³Ashtanbish shina shinalla yuyusha mikushaga pai crishka shina na rurashkamundaga juchachishka gangumi mikun; imada rurushash crishkallamunda na rurushaga juchadami rurun.

Cristo shina ganamunda

15 ¹Ñukuchiga kikinlladi kushiyanada na mashkushallami mashnalla jinchigunaga narij jinchi crijkuna imallabish jawalla pandarikiga randimunda apana ganchi. ²Tukigunami chaishujkuna ashtan jinchi gachun paigunaj allibuj imadash rurusha kushiyachinanchi. ³Cristolladikish Pailladi kushiyaringujka na rurugachu; ashtangarin Dios escribichishkabi nishka shinaga,

“Kanda litujkuna rimashkagunaga Ñukamada rimushka layadimi gaga.”^w

⁴Ñaubamu Dios tuki escribichishkagunaga, ñukuchida yachachingaj rurashkami; chi escribishkagunaga kushichisha na shaikushalla kati-na yuyida kusha shuyana yuyilla ganadami yachachin. ⁵Katina yuyida kushikuidash kuj Dioslladimi, Jesucristo rikuchishka shina kangunapura-bi shuj yuyilla ganada tukigunamu kuchun; ⁶shina kuki tukigunandij tandalla shuj shimillan, Diostaga ñukuchida Mandaj Jesucristoj Taitada ‘K'uillami gangui’ ninguchimi.

⁷Shinushaga ima layami Cristo kangunada japiga, shina layaidi Diosta jatunyachichun randimunda alli japinukichi. ⁸Kaidash ninimi, ñauba taitagunamu ‘Kushami’ nishkagunada p'aktachingumi Cristoga israelgunada sirvingu shamuga. Shina rurushami Dios p'aktachijti gashkada rikuchiga. ⁹Na israelgunabujkishmi paigunada llakishkallamunda Diosta ‘Allimi gangui’ nichun shamuga. Dios escribichishkabiga ninmi,

“Shinushaga na israelgunapurabimi Kandaga alabasha; Kambuj shu-tidashmi cantasha.”^x

¹⁰Shuj pushtubishmi,

“Na israelgunash Diosbujkunan tandanukusha kushiyichi,”^y ninmi.

¹¹Shinaidi shuj pushtubiga,

“Tuki llaktamundaguna, tuki pueblomundaguna Mandujta ‘Allimi gangui’ nichi,” nin.^z

^w 15.3 Pabloj rikibiga Salmos 69.9bi kai nishkagunaga Cristobimi p'aktuga, Paibuj Taitan parlarigushkabi rikukiga. ^x 15.9 Sal 18.49 ^y 15.10 Dt 32.43 ^z 15.11 Sal 117.1

12 Isaiasbish escribishaga,

“Isaibuj^a wawagunaj wawagunamundami shamunga, llaktagunada manduj gangu llujshinga.

Paibimi tuki yuyida churasha na israelgunaga shuyagungaguna,”^b ninmi.

13 Na shaikurishalla shuyana yuyida kuj Diosga, Paibi crishkamunda ima llakirinash illuj tukibi kushi kausida kangunamu kusha jundachichun, Diosbuj Espiritubuj ruri pudishkan shuyana yuyillada ashtandi yalli charichunmi mañani.

Na israelgunamu parlachun Pablomu mingashkamunda

14 Wauki panigunalla, allida rurungu yuyi junda shinaidi manchanaidi yachujkuna gasha kaishujkun chaishujkun allida rurachun yuyachinukusha kangunaidi ruranashkadaga ñukalladi allimi yachani. 15 Shina gakash kangunamu kaibi escribisha imadash na pakushalla maijin yuyigunada yuyachisha rimagani; Dios ñukada k'uyashami shina rurachun mingashkamunda, 16 na israelgunaj allibuj Jesucristobujta ruruj gasha Diosbuj Espiritu paigunada ch'ikunyachiki k'uilla ofrendada Diosmu kushka gachun Diosbuj Alli Shimida cura shina alli yachachij gani.

17 Shinushaga Cristo Jesusbi gasha Diosbujta ruragushkamunda ñuka ‘Allimi gani’ nina kabinlladimi. 18 Na israelguna Diosta kazuj tukuchunga ñukallamundadijka ima parlanada na charisha ashtan ñukabi rurachisha Cristo imada rurashkaidami nisha. Rimarishash rurushashmi, 19 pish na ruri pudishkagunada rurusha rikuchishkan shinaidi Diosbuj Espiritu ruri pudishkan tuki kaigunaga rurarishka. Shinami Jerusalemunda kallarisha Ilríco llaktagama maibi gashash Cristomunda Alli Shimida illujta parlagani. 20 Shinami Cristoj shutida na uyushka pushtugunabi Alli Shimida parlana yuyilla gasha parlagani, shujkuna kallarishkallabidijka ama kutin kallaringu, 21 chibuj randiga Dios escribichishkabi nishka shinaga, “Paigunamu ima urash Paimunda na parlashkagunadimi rikungaguna; shinaidi Paimunda ima urash na uyujkunadimi alli yachi chayungaguna,” ninmi.^c

Rikungu ringu munashkamunda

22 Kai ruranagunamundami kangunada rikungu ringu tauga kutin munashash na p'aktashkani. 23 Shina gakash kununga kai llaktagunabi ruranada ña tukuchishkamunda shinaidi tauga watagunada rikungu ringu munagushkamundaga, 24 España mu rigushaga kangunajta pasungumi

^a 15.12 Isaíga Rey Davidbuj taitami gaga. Davidbuj wawagunaj wawamundami Jesusga wachariga. ^b 15.12 Is 11.10 ^c 15.21 Is 52.15

munani; shinaidi asha p'unllagunada kangunan tandanukusha kushiya-shka k'ipaga, ñuka rigushkamu richun kanguna ayudanadami shuyani. ²⁵Shinash, chairitij kunundijka Jerusalenbi Diosbujlla gajkunamu ayudangabujmi riguni. ²⁶Acayamunda shinaidi Macedoniamunda crijkunami churanukunaga alli gashkada rikusha tandachishaga Jerusalenbi na charij crijkunamu kungu yuyarigaguna. ²⁷Paigunamu shina rurana allimi rikuriga; israelgunamu dibijma laya gashkamundaga shina rurana kabigaidimi; na israelgunaga israelgunajta Diosbuj alligunada japijkunami tukugaguna; chimundami paigunash imalla charishkamunda israelgunamu kunami gan. ²⁸Shinakiga kaida rurusha tukuchisha paigunamu tandachishkada illujta sakish rishka k'ipaga Españaamu ña rigushaga kangunadash rikusha pasushami. ²⁹Kangunajmu chayashaga Cristo kangunamu kushka tuki alligunan ñuka chayanada allimi yachani.

³⁰Shinash wauki paniguna, ñukuchida Mandaj Jesucristomundash Espiritu kushka k'uyimundashmi ñukan tandanukusha ñaubujmu katinukungau ñukamunda Diosta mañusha katichun mañabani. ³¹Judeabi gaj naidi kazush nijkunamunda ñukada Dios wakichichun, Jerusalenbi Diosbujlla gajkunamu kungu apagushkash alli japishka gachun mañabanguichi. ³²Shinushaga Diosbuj muni shina gakiga, manchanaidi kushiyasha rikungu chayashaga kangunakimi samarisha. ³³K'uilla kausida kuj Diosga tuki kangunan gachun. Shina gachun.

Rijsishkagunada saludashkamunda

16 ¹Ñukuchij pani Febedash alli gashkamunda japibaichi; paiga Cencreas pueblobi tandanukushka crijkunada ayudajmi. ²Diosbujlla gajkunapura gashka shina, Mandaj Jesusta crij gashkamunda alli japichunmi mañani; paiga taugagunada shinaidi ñukaidadikish allida ruragami. Chimunda imalladash kangunajta ministiki ayudabanguichi.

³Jesucristobujta ñukan igulda ruraj Aquiladash Prisciladash^d 'Alli gashka gachun' nibanguichi. ⁴Wañunada na manchushalla ñukamundami paigunaj kungadadi p'itishashka gangau gagaguna, paigunada 'Diosolopai' nishaga na ñukallash ninichu, ashtanbish na israelgunapura tuki igilllagunabishmi 'Diosolopai' ninguna. ⁵Shinaidi paigunaj wasibi tandanukushka crijkunadash 'Alli gashka gachun' nibanguichi. Ñuka k'uyashka wauki Epenetodash 'Alli gashka gachun' nibanguichi; Asia llaktabiga paimi Cristoda kallari crij gan. ⁶Mariadash 'Alli gashka gachun' nibaichi; paimi kangunamu pachun ruruj gashka. ⁷Ñukaj llaktallamundadi shinaidi carcelbish ñukan gaj Andronicodash Juniastash 'Alli gashka gachun' ninmi, nibanguichi. Paigunaga Dios agllasha kachashkagunapura manchanaidi 'Alli' nishkaguna shinaidi ñukadash ñaubushadimi Cristoda crigaguna. ⁸Manduj Jesusta crij ñuka k'uyashka

^d 16.3 Hch 18

Ampliatoda ‘Alli gashka gachun’ nibanguichi. ⁹Cristobujta ñukuchin igulda ruraj Urbanoda, ñuka k'uyashka Estaquistash ‘Alli gashka gachun’ nibanguichi. ¹⁰Cristoda alli crij gashkada rikuchimuguj Apelesta shinai Aristobuloj familiagunadash ‘Alli gashka gachun’ ninmi nibanguichi. ¹¹Ñukaj llaktallamundadi Herodionda shinai Manduj Jesusta crij Narcisoj familiagunadash ‘Alli gashka gachun’ nibanguichi. ¹²Mandajbujta ruruj Trifenadash Trifosadash shinai Mandajmu pachun trabajaj k'uyashka Persida-dash ‘Alli gashka gachun’ nibanguichi. ¹³Mandaj agllashka ‘Alli’ nishka Rufoda shinai pai-buj mama ñukakish mama shina gajtash ‘Alli gashka gachun’ nibanguichi. ¹⁴Asincritoda, Flegonteda, Hermesta, Patrobasta, Hermesta shinai tuki paigunan gaj crij waukigunadash ‘Alli gashka gachun’ nibanguichi. ¹⁵Shinai Filologoda, Juliadash, Nereoda paibuj panidash, Olimpastash tuki paigunan gaj Diosbujlla gajkunadash ‘Alli gashka gachun’ nibanguichi.

¹⁶Kaishujkun chaishujkun ñawi ichibi alli yuyin muchusha ‘Alli gashka ganguichi’ ninukichi. Cristoj tuki iglillagunamundami kangunada ‘Allilla gashka gachun’ ninguna.

¹⁷Wauki paniguna, kangunamu yachachishkagunada ch'ikun ch'ikun yuyarinukuchun pandachingu munujkunamunda yuyinlladi gabaichi, paigunamunda laduyachunmi mañani. ¹⁸Paigunaga ñukuchij Mandaj Cristobujta na rurujkunachu, ashtangarin kikinbuj iksallabi yuyaringuna. K'uilla uyanaidi shimigunada rimarishami imash na yachujkunada uma pillunguna. ¹⁹Kanguna kazujkuna gashkadaga tukigunami yachi chayan; kanguna shina gashkamunda kushiyanimi. Shina gashash allida rurungajka yuyisapaidi gachun, na allida rurungujka imash na yachuj shina gachunmi munani. ²⁰K'uilla kausida kuj Diosga ñalla Satanasta vincishami kangunaj chakibi saruchun churunga. Ñukuchida Mandaj Jesucristo kushka alligunaga kangunan gachun.

²¹Ñukan igulda ruraguj Timoteosh shinai ñukaj llaktallamundadi Lucio, Jasonbish, Sosipaterbish ‘Allilla gashka gachun’ ningunami.

²²Ñuka kai cartada escribiguj Terciosh Mandajbuj shutibi kangunada ‘Allilla gashka gachun’ nini.^e

²³Shinalladi ñukamush tuki tandanukushka crijkunamush paibuj wasibi sakirichun mañachij Gayosh, kai pueblobuj kuchkida tandachij Erastosh, shinai wauki Cuartoshmi ‘Allilla gashka gachun’ ninguna.^f

Tukuchingu Diosta ‘Allimingui’ nishkamunda

²⁵Alli Shimida ñuka parlushka shina, Jesucristomunda yachachishka shina, kai pachada narij rurashkamunda pacha pakalla charigushkada

^e 16.22 Pablo imada escribichun nigushkada kai cartabiga Tercioga escribin. Chidami yachachin. ^f 16.23 Ñaua escribishkagunabiga vs 24 illan. Shinash, k'ipa rurujkunaga churushkamaminga kashna nisha: Ñukuchida Mandaj Jesucristo kushka alligunaga tuki kangunan gachun. Shina gachun.

pish na yachushkada rikuchishka shinami Dios kangunada jinchiyachingu pudin; chimunda Paidaga 'Allimingu' nishunchi. ²⁶Kununga chi pakashkagunadaga rikuchishkami gan; Dios nishkada parlujkuna escribishka shina, tuki ratugama kausaj Dios mandashka shinami, Diosta crisha kazuchun tuki llaktamundagunamu yachi chayachishka gaga. ²⁷Tukida yachuj shujlla Diostaga Jesucristomundami ima uragamash 'K'uilladimi gangui' nishka gachun. Shina gachun.